


Augusto Rodriguez:

"TRABAO DI BENTA RIBA GAROSHI TA HOPI SALUDABLE"



ORANJESTAD (AAN)- Don Augusto Rodriguez Suero a nace na Santo Domingo, pero ta sinti su mes feliz na Aruba, y parti di dje. Un motibo grandi tin pa expresa su mes asina: su yiu a nace na Aruba. E ta casa y a bini Aruba cinco aña pasa, via di un amigo. El a haya trabao na Ritz Aruba N.V, unda tabata tin mester di un hende mas pa bende productonan riba caya, cu garoshi.

"Mi trabao ta consisti di bende e productonan di Ritz na diferente ruta. Mi ta calcula cu mi ta recore varios kilometro pa dia si tene na cuenta cu e ruta por ta bay for di Playa te Tarabana, Ponton, Madiki, etc. Ta un trabao duro pa motibo di e calor, pero tin su beneficio. E hecho cu e garoshi tin bicicleta ta

hacibo haci ehercicio varios ora pa dia, y ademas hala rosea den aire puro", segun el a indica.

E ta gusta su trabao hopi, y ta considera cu ta un bon manera di gana e pan di cada dia, ya cu cada trahador ta gana mas cu un sueldo minimo of cobra onderstand.

Don Augusto tin cierto clientenan fiho. Tin hende ta compra tur Diasabra e juice- nan pa nan yiunan bay school den siman. E ta bende tanto cu turista como cu hende local.

E muchanan di school, den e rato di pause ta gusta compra sea ice cream of juice, pero sobre todo "palo frio".

"Mi ta kere cu mi trabao ta importante. Mi ta conoce hopi hende y nan ta tratami hopi bon. Mi tin hopi hende conoci caba. Ta un trabao di dignidad y ta bale la pena pa mira con bo ta alivia e sed di un persona ora cu tin hopi calor.

Pero tin algun persona ta bisa cu nos trabao ta "horibel". Mi ta biba bon, mi ta sostene mi cas mi esposa, mi yiu, mi ta cumpli cu mi impuesto, y tur esaki cu loke mi ta gana", el a bisa.

DIA DI TRAHADOR

"Pa mi Dia di trahador ta uno hopi importante. Aunque mi tin cu traha pasobra e benta di cada dia ta conta, mi ta kere cu ta mercedi pa tur trahador haya un reconocimiento, y tambe pa duna danki na DIOS cu tin trabao y un dia special pa reconece esaki", el a bisa.

ARUBA

Aruba, su playa su lama y su trankilidad ta loke mas don Augusto ta aprecia. Den cinco aña na Aruba nunca el a haya su mes involvi den ningun problema, ni na trabao ni den e comunidad.